

TE NENEURAA API

NENEIHIA I ROTO I TE PIHA NENEIRAA A TE EKALÉSIA A IESU MESIA I TE
FEIA MO'A I TE MAU MAHANA HOPEA NEI.
PAPEETE, TAHITI, I TE MAU AVA'E ATOA.

*Te hoo: E 2 farane i te matahiti Hoê
e e 5 farane i na matahiti e Toru.*

No. 12

Ditema 1937.

Mat. 31.

Te Autahu'araa A MELEMIZEDEKA

Ia Petero, e ia Iakobo, e ia Ioane, o Ta'u i tono atu ia outou na, e na ratou i faatoroa ia outou i to'u nei io'a e ua haa-mau ia outou ei mau Aposetolo, e ei ite mau no to'u nei Io'a, e ia afai i te mau taviri no to outou toroa; e no te mau mea ta'u i faaite atu ia ratou ra. Ua horoa'tu vau ia ratou te mau taviri no to'u basileia e te tuuraa evanelia no te tau hopea nei e no te îraa o te tau e i reira vau e amui ai te mau mea atoa ei hoê, te mau mea atoa o te ra'i e to te fenua atoa ra.

B. F. 27:12-13.

Ua horoahia te reira Autahu'araa Mo'a i nia ia Iosepha Semita raua o Olive Taudere, i roto i te ava'e Tiunu 1829, e ua vai noa te reira i roto i te Ekalesia, mai to'na fariiraahia.

Mai to'na horoaraahia e te Mesia, ia Petero, Iakobo e Ioane, i te avatea o te mau tau, ua na reira atoa hia i teie tau hopea nei. Ua horoahia i nia ia Iosepha raua o Olive, e Petero Iakobo e Ioane, e ua horoa raua i te reira i nia i te mau Aposetolo, e ua reira atoa ratou i nia i te mau taata i muri iho.

E TAMA'I RAHI.

E homa, e te mau feia atoa tei hinaaro i te ORA, A FAACHINEINE TATOU, no te mea ua tupu a'e nei te hoê tama'i tei hau i te rahi e te ri'ari'a, i roto i te mau fenua atoa o te ao nei: e aita â i itehia te hoê tama'i mai te ie te huru. E i teie nei taime, ua rahi roa'tu te mau taata tei pohe i roto i teie tama'i, i te mau tama'i atoa, e te tere noa nei â to tatou enemi rahi ma te puai e te manuia i roto i tana ohipa ri'ari'a. No reira, e homa, te parau atu nei au ia outou, e tia ia tatou atoa ia *Faachineine* no te mahana e roohia'i tatou e taua enemi rahi ra e ia ore tatou ia pohe ia'na.

Eaha ra ta tatou ravea faachineine, ia ora tatou, no te mea o teie tama'i e parauhia nei, e ere ia i te tama'i i tama'ihia e te rima o te taata, e te mauha tama'i ra, ua tama'ihia ra i roto i te aau o te taata nei; e ia haavîhia te hoê taata i roto i taua tama'i nei, e ere ia to'na tino ana'e te pohe, o to'na atoa ra varua, e e riro oia ei tavini ana'e no to'na ra enemi rahi, oia hoi, o Satane e ta'na mau melahi. E te reira hoi te tumu i parauhia'i no teie tama'i, ua hau roa ia i te ri'ari'a e te mätä'uhia.

No te aroha rahi o to tatou Atua, te vai nei te hoê ravea rahi no te paruru ia tatou i to tatou enemi, oia hoi, te hoê ravea i faachineinehia e ANA, e na'na iho i faaite mai i te reira na roto i te hoê o ta'na mau tavini, o Paulo, tei parau mai e: *A rave hoi outou i te haana tama'i atoa a te Atua ra, ia outou ia patoi atu i te enemi i te mahana ino ra, e tia roa a'e-ra ia, ia mau â. Ia mau, ma te tatuahia to outou tauupu i te parau mau, e ma te tapo'i ouma ra o te parau-tia i te ahuraa; e ma te faatamaahia to outou avae i te faachineineraa o te evangelia ra o te hau; a rave hoi i te paruru ra o te faaroo, ei nia roa iho ia, o te mea ia e pohe ai te mau ihe auahi atoa a taua varua ino ra. Ephesia 6:13-16.* O teie mau iho nei ta tatou ravea, ia faaaromai tatou i to tatou mau mahana ati nei, oia hoi, te mahana e faahemahia'i tatou e te Diabolo. E a faa-

riro hoi tatou i to tatou faaroo, e te Varua o te Atua, ei paruru no tatou, e te Evanelia mau a te Mesia, ei aratai no tatou.

Te vai nei te tumu rahi i tuuhia mai ai tatou i roto i teie nei ao ati nei, oia hoi, ia tamatahia tatou, e ia faaite tatou i to tatou Metua, na roto i te ohipa nei, o vai te tamarii aroha, e o vai te tamarii aroha ore. E ite noa hoi te Metua i te mau tamarii aroha e te mau tamarii aroha ore, no te mea, te mau tamarii atoa te hinaaro Ia'na, e haapao ratou i Ta'na mau faaueraa, e e patoi hua'tu ratou i te mau mea ino atoa ra. E ia tae mai taua mahana hopea ra, e tia ia i te Metua ia faautua i ta'na mau tamarii mai te au i taratou mau ohipa e to ratou aroha Ia'na.

No reira, e homa, teie te ravea e tamatahia'i tatou, e ia itehia to tatou aroha e to tatou faaroo, oia hoi, na roto i te mau faahemaraa a te Diabolo. E te mau taata te faaoromai i teie mau faahemaraa e te mau ati o te ao nei, e roaa ia ia ratou te ORA, no te mea, te na ô maira te parau a te Atua: *E ao to te taata e faaoromai i te ati, ua tia ana'e hia mai hoi oia ra, e roaa ia ia'na te korona ora, i ta te Fatu i parau mai e no te feia i hinauro ia'na. Iakobo 1:12.*

E homa, te ite nei tatou i te tumu no to tatou oraraa nei e te ravea hoi ia faaorahia tatou, i roto i teie tama'i rahi o te ao nei, tei faatupuhia a'enei e Satane e ta'na mau melahi, e e tia roa ia tatou ia haapao i te reira, ia ora tatou atoa, ma te oaoa, i mua i To'na aro e a muri noa'tu.

O te hinaaro mau ia o to tatou Atua, e to tatou atoa hoi.

Papahia e Henere Orometua,

Ua haamaitaihia te ao nei e te feia tei rave i te ohipa ra, eiaha ra na te feia tei paraparau noa no taua ohipa ra.

JAMES OLIVER.

EDITORIALE

THOMAS L. WOODBURY.

TE AUTAHU'ARAA A MELEHIZEDEKA.

Peresibutero. I roto i te Pūpū Peresibutero te vai ra e 96 melo. Tei ia ratou te Mana no te haamaitai i te tamarii rii, ia faatoro'a i te tahi atu â mau Peresibutero e ia tauturu i te Hitu Ahuru i roto i ta'na ohipa. E tia atoa i te Peresibutero ia mono i te Tahu'a Rahi, i roto i ta'na ohipa, mai te mea aita oia i reira. E tia atoa i te Peresibutero ia rave i te ohipa orometua, i roto i te mau Amaa, e ia tauturu i te Autahu'araa iti, i roto i ta'na ohipa.

Te Hitu Ahuru. E hitu ahuru melo i roto i te hoê pūpū. E ia î maitai te hoê pūpū e mea tia ia vai e Hitu Peretiteni. Na te Peretiteni *Matahiapo*, oia hoi, tei hau atu i te paari, e faatere i te pūpū i roto i te mau ohipa atoa ma te tauturuhia e na Peretiteni e ono.

Teie te ohipa i faataahia na te Hitu Ahuru, oia hoi, ia haere e poro haere i te Evanelia i te mau nunaa o te ao nei, e ia tauturu i te Tino Ahuru na piti Aposetolo i te haaparareraa i te Evanelia. Ia anihia ratou e mea tia roa ia tauturu ratou i te ohipa i roto i te mau Amaa, e ia rave i te mau ohipa atoa e horoahia, ia ratou, e te mau feia faatere.

Tahu'a Rahi. Aita i ta otiahia te rahiraa o te mau melo i roto i te hoê pūpū. E tia hoi ia haere ratou, mai te Hitu Ahuru ra, ia afai i te Evanelia i te mau nunaa atoa; area ra, ta ratou ohipa i faataahia, o te raveraa i te ohipa faatere e ei Peretiteni i roto i te mau Tītī e te mau Amaa.

Patereareha, e a ore ra, Haapii Evanelia. Hoê noa iho Patereare-

ha e vai nei **NO** te Ekalesia, e ua topahia oia i te ia'oa ra, te *Patereareha Peretiteni*. Ua faatiahia te reira tufaa o te Autahu'araa i te mau mahana o Adamu e ua parauhia e, e hee te reira mai te metua i te tamaiti.

Ua maiti atoa hia te tahi mau Patereareha no te raveraa i te ohipa Patereareha I roto i te mau Titi e te mau Amaa; e te ohipa i faataahia na ratou, o te haamaitairaa ia i te mau melo no te Ekalesia e ia rave i ta ratou ohipa i raro a'e i te faatereraa o te *Patereareha Peretiteni* mai te au i to'na faatereraa hia e te Peretiteniraa Matamua e te Pupu Ahuru ma Piti Aposetolo.

Te Aposetolo. E mau ite ratou no te i'oa o Iesu Mesia i te ao nei. Tei ia ratou te mana no te paturaa e te faatiraa i te mau Amaa no te Ekalesia. E tia ia ratou ia rave e ia faatere i te mau oro'a mo'a atoa. I roto i ta ratou atoa ra mau ohipa, e rave ratou i te reira i raro a'e i te faatereraa o te Peretiteniraa Matamua. Ia faataahia e ia maitihia e Hoê ahuru ma Piti Aposetolo, e parauhia ratou i te Pupu e a ore ra, te Apooraa o te Ahuru ma Piti.

Te Peretiteniraa Matamua. Ua riro te Peretiteniraa Matamua ei Pupu faatere i te Ekalesia atoa; na roto i te aratairaa, no te ra'i mai, e faataahia te hoê Peretiteni no te faatere i te Ekalesia atoa. Ua itehia oia ei Peretiteni, no te Autahu'araa Teitei, no te Ekalesia. Ua maitihia oia ia riro ei *Hi'o*, ei *Heheu parau* e ei *Peropheta*. Ua tanturuhia oia e na taata e piti, tei faito to rana Autahu'araa e to'na; e teie na Tahu'a Rahi e toru, ia au maitai to ratou maitiraa e to ratou fariiraa hia, e riro ia ratou ei Pupu no te Peretiteniraa Matamua no te Ekalesia. B. F. 20; 107 & 124.

A imi i te tahi tumu no to outou orara, e ia itehia, a tuu i roto i ta outou mau ohipa te taatoaraa o to outou puai varua, e te puai tino atoa hoi, tei horoahia mai, no outou, e te Atua.

CARLYLE.

TE MATAHITI APÎ

TE afai faahou mai te Tau, ia tatou, te hoê Matahiti Apî.

I roto i te mau tenetere e rave rahi ua haapao te ati Iseraela i te hoê peu nehenehe roa i ô ratou ra, oia hoi, ia tae i te 50 o te mau matahiti, e faaore roa tatou i te mau tarahu, te tahi i te tahi, e e haamata ratou i te matahiti apî ma te tarahu ore.

Ua faatupu te reira huru ohipa i te oaoa rahi i rotopu i te mau taata tei parahi i te fenua Kanaana.

Te hinaaro nei au ia itehia tatou, e teie nei Matahiti Apî, ma te tarahu ore, e ia rahi roa mai te mau mea maitatai. Te hinaaro nei au ia tomo mai, te oraraa maitai e te oaoa, i roto i to tatou mau utuafare, i te mau poipoi atoa, e ia parahi te *Hau* i rotopu ia tatou e a muri noa'tu.

E faatere te Hau i te mahana i te vahi na te feruriiraa maitai e faatere i te mana'o.

COLLINS.

TE PARAU AUTAHU'ARAA.

TIHOTI M. Lake
LEVI Leatham

BENIAMINA Winkel
ELEDONA Mortensen

Haapiiraa no te Ava'e TENUARE,

I te Sabati matamua e te haapaeraa maa hoi, a haapii atu i te parau no te faaho'iraahia mai te Autahu'araa a Aarona, te rahiraa o te man melo i roto i te mau Pŭpŭ e ta ratou ohipa i faataahia.

Ia tae i te piti o te Sabati, tamau noa â i te reira haapiiraa e amui atoa mai i te haapiiraa no nia i te Autahu'araa a Melehizedeka mai te amui atoa mai i te mau parau i roto i te Editoriale e tei papai atoa hia i nia i te apî matamua o te

Ve'a nei.

Ia tae i te toru o te Sabati e haapii i te parau no te Orometua i roto i te Amaa.

I te maha o te Sabati e haapii i te parau no te mau Toro'a no te Autahu'araa mai tei itehia i roto i te Bibilia e te Buka a Moromona.

I rotopu i na ino e piti, eiaha e maiti i te hoê; i rotopu i na maitai e piti a rave ia raua e piti atoa ra.

Tryon EDWARDS.

Na Te Mau Maapii Mahaere na te mau utuafare,

A aroha'tu i te mau archa o te Matahiti Apî i te mau Feia Mo'a e a ani atu ia noaa ia ratou te oaoa e te poupu, e a hapii atu ia ratou te mau ravea e noaa'i te reira. A faaitoitatu i te taata ia tuu i te tahi na moni rii i te hiti no te mau mahana ino ra.

A haapii atu ia faanehenehe i te mau utuafare ia riro ei oaoaraa no tei parahi i roto ra. Ia hi'o mai te Atua e, te tamata ra te taata i te mea maitai, e tauturu mai Oia. A haapii atu i te Feia Mo'a ia riro ratou ei feia hau e te haapao i te mau ture fenua; ia aufau i ta ratou mau tarahu e ia amu ratou mai te au i te moni tei noaa ia ratou.

E ia na reira ratou, e vai moa te hau e te peapea ore i roto i to ratou mau utuafare.

Eita e tia i te hoê taata ia haapao maitai i te taime no to'na iho oraraa, mai te mea eita oia e haapao maitai i roto i te maitiraa i to'na mau hoa.

Jeremy TAYLOR.

TE SOTAIETE VAHINE TAUTURU.

MAUDE WOODBURY.
TOTARE GREEN.

NOROTA HARDY,
IOSEPHA G. STEVENS

Haapiiraa no te Ava'e TENUARE.

Mahana Maha (Matamua).

Iritiraa mana'o no te Matahiti Apî. Eaha te ohipa e au ia rave. *Salamo 84.*

Mahana Maha (Piti).

Na Tuahine o te hahere na te mau utuafare ra, a haapii ia faaturahia te Feia toro'a e tia'i; te mau pûpû toro'a i roto i te Ekalesia e te mau pûpû toro'a o te Hau atoa ra. Eiaha e haamo'e i te mau metua, te mau tupuna e te mau fetii, e haamana'o ra i te mau ruau e te taata tei roohia i te ati; *Exodo 20:12.*

Mahana Maha (Toru).

O vai te atî Iareda? No hea mai ratou ra? Eaha te anoutau i haapurarahia'i ratou na te ao nei? O vai ia to ratou aratai? O vai hoi to tatou aratai?

E tuu atu i teie nei mau uiraa, i te mau Tuahine, hou te pureraa: e papai te Peretiteni i te mau uiraa e e horoa'tu i te reira, i te mau tuahine, na mau a'e i te pureraa.

E imi outou i te mau pahonora ia haamaramamahia te pûpû Sotaiete Vahine Tauturu. A hi'o, i te Buka a Etera.

Mahana Maha (Maha).

Ua faataahia te maha o te mau Mahana Maha ei mahana ohiparaa no te pae tino, oia hoi, e paraparau e e haapii atoa hoi, te mau tuahine, no nia i te mau ravea no te faaneheneheraa i te mau utuafare e te mau aua atoa hoi.

A tauturu i to outou mau hoa ia faanehenehe i to ratou

man aua, e a rave maitai i ta outou mau faaapu tiare ia riro te reira ei mea unauna maitai. A parau, i roto i ta outou putuputuraa, no nia i te mau maa e tupu nei i to outou fenua, e te mau ravea no te tunuraa maitai ia ratou.

Ia riro oe ei taihaa, eiaha ra ei parau puohu i taua taihaa ra. A faaitoito i roto i to oe na oraraa, no te mea e tia ia oe ia na reira. A faateitei to oe na mata i nia e a hi'o i te ra'i moana. E a faaineine ia oe no te faaipoipo atu i te tahi tane.

SUSA YOUNG GATES,

HAAPIIRAA SABATI.

Goladena W. Mack
Teneta A. Wilde

Anderea N. Machen
Pereti B. Asay

IRAVA TAMAU AAU. ALAMA 20:26.

Haapiiraa no te Ava'e TENUARE.

- | | |
|---|-----------------------|
| 2. To Amona here rahi i to te ao. | <i>Alama pene 20.</i> |
| 9. To Aarona rana Muloki | " 21. |
| patoiraahia e te atī Amaleki. | |
| 16. To Aarona haereraa i te | |
| fenua ra i Mephi. | <i>Alama pene 22.</i> |
| 23. Parau faaite no te arii atī Lamana. | " 23. |
| 30. Hi'opoaraa no te mau tufaa atoa. | |

Na te Pupu Piti.

A hi'o i te parau no te Autahu'araa a Melehizedeka, i te apī matamua o teie nei ve'a, e i te Editoriale atoa hoi.

Te Paraimere.

2. Te Amuraa maa hopea *Mareko 14:12-26; Ioane 13.*
 9. Iesu i roto i te aua. *Mataio 26:36-47.*
 16. Ua pohē o Iesu no te taata. *Luka 23:24-44.*
 23. Te taata faaroo ore. *Ioane 20:24-30.*
 30. Te hoi'iraa o Iesu i te fare
 o To'na Metua. *Ioane 21:20-25.*

*Mai te mea te hinaaro nei oe ia hi'o maitaihia oe e te taata,
 e mea tia roa ia amui atu oe i te mau feia roo maitai ra.*

Bruyère.

HAAPIIRAA NA TE FEIA API.

TENA Palmer

NOELA. C. Devey

VERANONA C. Thurgood

VELA C. Hunting.

HAAPIIRAA NO TE AVA'E TENUARE.

I Papaihia e Beniamina Winkel.

Haapiiraa 13.

Te faatiaraa o te Ekalesia.

Uiraa 1. I nafea i faatihia'i te Ekalesia i te Tau hopea nei ?

Pahonoraa. Ua faatihia ia i te 6 no Eperera, i te matahiti 1830. Ua haaputuputu na taata too ono i roto i te fare o Petero Vitimera, i roto i te oire ra o Faiete, i te mataeinaa ra o Seneca, i te tufaa fenua ra o New Ioka.

Uiraa 2. Na vai te Ekalesia i faatia ?

Pahonoraa. Na te Atua i faatia, na roto i to'na peropheta ra o Iosepha Semita.

Uiraa 3. Eaha te mea tei faataa-ê te Ekalesia nei, oia hoi te tuuraa parau i te tau hopea nei, i te mau tuuraa parau i mutaa ihora ?

Pahonoraa. Teie te mea taa-ê: teie te tau hopea, e te faa-hoperaa o te mau tau atoa i roto i te reira. Teie te tau ta Paulo i ite a papai ai oia i ta'na Episetole i to Ephesia: E ua faaite mai ia tatou -- e ia tae i te tuuraa parau i te hoperaa mau o te mau tau ra, e amui ai oia i te mau mea atoa i te Mesia ra, to te ra'i, e to te ao nei ei ia'na.

Uiraa 4. Eaha te mea tei faatupu to Iosepha hinaaro ia haere i roto i te uru raau ia pure ?

Pahonoraa. Ua tai'o oia i roto i te Bibilia, i roto i te Iakobo, i te pene 1 i te irava 5.

Uiraa 5. E mea nahea te tai'oraa o te reira irava ?

Pahonoraa. E te ere ra râ te hoê o outou i teite, e ani oia i te Atua ra, o te horoa hua mai i te maitai i te taata atoa ra, ma te patoi ore, e e horoa hia mai ta'na.

Uiraa 6. Eaha ia te huru o te orama tei itehia e Iosepha, a imi ai oia i te haapaoraa mau ?

Pahonoraa. Na te hoê reo himene e faaite mai: E tamaiti apî roa o Iosepha Semita, i te taima ta'na i haere i roto i te uru raau. Ia pure i te Atua no te maramarama, ia ite papu roa teihea te haapaoraa mau. Tuturi oia i raro, tei te pure matamua tae maira o Satane ia faahema ia'na. E noa'tu i te reira, tiaturi noa â Iosepha i te Fatu mana ia pahono i ta'na pure mau. I reira ihora, fâ maira te hanahana, e ua ite mata oia i te Metua e te Tamaiti. Te na-ô maira te Metua: O tau Tamaiti here teie, a faaroo maite ia'na— Tau Tamaiti fanau tahi. Parau maira te Mesia, ia Iosepha Semita, ua hapehape roa te mau haapaoraa atoa. E ia faaroo maitai oia i ta'na ra parau, e horoahia mai ia'na te mana e te Autahu'araa Mo'a.

Uiraa 7. Ua faaitehia mai na faufaa rahi e pae i roto i teie nei orama — Eaha ratou ra ?

Pahonoraa. 1. Ua faaitehia mai te hohoa mau o te Atua.

mai to te taata nei hohoa.

2. Ua faaite papuhia e, ua taa ê te Tamaiti e te Metua, e no reira, te mau parau i roto i te mau papairaa tei faaite mai e, ua hoê raua, oia mau roa, ua hoê i roto i te ohipa, te hinaaro e te mana'o, eiaha râ i te tino.

3. Ua faaite atoa hia mai e, ua ore te Ekalesia mau i nia i te fenua nei.

4. Ua iteahia te hape o te mau haapaoraa i te parau e, ua faaea te Atua i te heheu mai i te parau, mai te au i tei ravehia i mutaa ihora.

5. Ua tuuhia te hoê ite o te Atua i nia i te fenua nei, o te tia i te parau e, *Te ora nei te Atua, e o Iesu te Faaora*, no te mea ua ite mata oia ia raua, no reira, ua haamanuhia te niu o te Faaroo.

PARAU TAUTURU.

Ephesia 1:9-10. Iakobo 1:5. Parau Tuatapapa.

HAAPIIIRAA 14

Ei Feia rave hoi outou i te parau nei.

E AU hoi te basileia o te ao ra i te hoê taata fare, o tei haere i rapae au i te poipoi roa e tarahu i te rave ohipa i ta'na ra ô vine. E au a'era ta'na parau i te tahi pae rave ohipa e ia taihoê moni veo i te mahana hoê, ua tono atura oia ia ratou i roto i ta'na ra ô vine. E tae a'era i te toru o te hora, haere faahou atura oia i rapae, ite atura i te hoê pae taata i te tia-noa-raa i te hooraa tao'a ra; ua parau atura oia ia ratou, E haere atoa outou i roto i tau ô vine ra, e na'u e horoa'tu na outou i tei au ra. Haere atura ratou. Haere faahou atura oia i rapae i te hora ono e te iva, ua na reira faahou atura. E tae a'era hoi i te ahuru ma hoê o te hora, haere faahou atura oia i rapae, itea'tura te tahi pae taata i te tia noa raa, e ua parau atura ia ratou, Eaha outou i tia ohipa ore noa'i i ô nei e mairi noa'tu teie nei mahana? Ua na ô maira ratou, No te mea aore e taata i tarahu mai ia matou. Ua parau atura oia ia ratou, E haere atoa outou i tau ô vine ra; e na'u e horoa'tu na outou i tei au ra. E rui ihora, ua parau atura te taata ô vine ra i te tiaau no'na. A parau atu na i te mau rave ohipa ra, e hopoi atu i ta ratou utua; e na te hopea e tae noa'tu i te matamehai ra. E

tae maira tei tarahuhia i te hora ahuru ma hoê ra, noaa ihora ta ratou tai hoê moni veo i te taata hoê ra. Ia tae maira râ tei tarahuhia i te matamehai ra, mana'o ihora ratou e rahi ta ratou e noaa, taihoê atoa râ a ratou moni veo i te taata hoê ra. E tei te raverâa ra, ua omumu ihora ratou i te taata fare ra, na ô maira, Hoê roa râ hora a teie feia i te ohiparaa, e ua faafaito oe ia ratou ia matou nei i tei faaoromai i te rohirohi e te veavea o te mahana. Ua parau atura râ oia i te hoê o ratou, E hoa, aita i hapa ta'u parau ia oe: aore taua i faaau i te parau e ia hoê a'e a oe moni veo? A rave i ta oe, a haere. O to'u ia hinaaro, mai ta oe atoa na ia hopoi atu na te faa hopea nei. Eiaha vau e haapao i to'u hinaaro i ta'u iho nei? Te ino na to oe mata i to'u nei maitai? Oia ia, e riro te hopea ei matamehai, e te matamehai ei hopea; e rave rahi hoi tei parauhia, e iti râ tei maitihia. MATAIO 20:1-16.

Uiraa 1. Eaha ia te parau faaau no te mau rave ohipa?

Pahonoraa. O ratou tei haamata i te matamehai, hoê ia moni veo ta ratou o tei haamata i te ohipa i te ahiahi, e farii ratou te mea tei au i to ratou itoito.

Uiraa 2. Nahea ra tatou i te faatia i te aufauraa i te moni hoê i te feia ohipa tei haamata i te matamehai e i tei haamata i muri mai?

Pahonoraa. Te feia matamua, ua faatano noa ratou i to ratou itoito i te moni i faaauhia, e tirara. Te feia i muri mai ra, ua hau roa'tu to ratou itoito e te maitai o te ohipa i te taime poto noa; no reira e tia ia tatou ia faatia i te aufauraa i te moni hoê ra.

Uiraa 3. E au anei teie parabole ia tatou iho i te Ekalesia nei?

Pahonoraa. Oia mau ia; te vai nei taua hohoa ra i rotopu ia tatou. Ua tuu mai te Atua i te ohipa, e ua faataa hoi Oia i te utu'a e au ra. E, o tatou nei, ua farii i te ohipa e e neheuehe noa ia hi'o i te huru mai tei faaitiehia i roto i ta Iesu parabole.

Uiraa 4. E mea nahea tatou i te ite e, ua ravai to tatou itoito i roto i te ohipa?

Pahonoraa. A tai'o i te parahole i roto i te Luka 17:7-11. E ia papu te reira parabole ia tatou, e tia ia ia tatou ia pahono mai teie: O ratou tei rave i te mau mea atoa tei faaue

hia mai, e tei rave i te tahi atu â mau ohipa tei ore i faauehia—ia maitai te ohipa. Ia tavini ia'na ma to aau, to mana'o e to varua o hope roa a'e, i reira paha te Atua e parau ai e, ua navai te itoitoe e ua mauruuru Oia.

PARAU TAUTURU:

Mataio 20:1-16. Mataio 23:23. Luka 17:7-11.

Ei feia rave hoi outou o te parau nei, eiaha ei feia faaroo noa i te haavare noa raa ia outou iho. O te taata hoi i faaroo noa i te parau e aore oia i rave, e au oia i te taata e hi'o noa i to'na iho mata i te hi'o ra. Iakobo 1:23-24.

HAAPIIRAA 15

Te fanauraa o te ORA.

Uiraa 1. I hea o Iesu i fanauhia'i ?

Pahonoraa. I Betelehema i Iudea.

Uiraa 2. Eaha te auraa o te parau "Epherata" ?

Pahonoraa. Hoê â ia i te parau Betelehema.

Uiraa 3. Ua tohuhia anei, hou to'na fanauraa, e fanauhia Oia i Betelehema. Na vai i tohu ?

Pahonoraa. Ua tohuhia ia e Mika, e hitu hanere e tiahapa matahiti hou i haapaohia'i.

Uirua 4. Tei hea te vairaa o Betelehema ?

Pahonoraa. Tei Iudea, e pae maile i te apatoa o Ierusalema.

Uiraa 5. No te aha o Iosepha raua o Maria i haere ai i Betelehema ? Tei Nazareta hoi to raua fare faaearaa ?

Pahonoraa. Ua haere raua i reira ia papaihia to raua na i'oa i roto i te utuafare o Davida. Ua anihia te huiraatira taatoa ia na reira ei tai'oraa i to taua fenua ra. E no te rahi o te mau taata tei tae i reira, aita i roaa ia raua te hoê fare taotoraa, no reira ua taoto raua i roto i te hoê fare vairaa

puaatoro,— e phatene — e vairaa matie, i reira to Maria fanauraa i te Faaora o to te ao.

Uiraa 6. Eaha ia te mahana o Iesu i fanauhia'i?

Pahonoraa. Ua fanauhia Oia i te **ONO no EPERERA.**

Uiraa 7. Eaha te mea tei haapapu ia tatou e, ua fanauhia Oia i te 6 no Eperera?

Pahonoraa. O te Atua iho tei haapapu mai ia tatou i te reira. Te na ô maira te hoê irava i roto i te Buka Fafau: Te tupuraa o te Ekalesia a Iesu Mesia i teie mau mahana hopea nei; ua mairi e hoê tauatini e vau hanere e e toru ahuru aore matahiti i muri, mai te haereraa mai o te Fatu, te Faaora, i te pae tino nei; E o tei faatia papu hia mai te au i te mau ture o te fenua nei, e mai te hinaaro e te faaueraa o te Atua, i te maha o te ava'e, e i nia i te **ONO o te mahana o te ava'e tei parauhia o EPERERA.**

Uiraa 8. No te aha ua riro te 25 no Ditema ei mahana haamana'oraa no te fanauraa o Iesu?

Pahonoraa. No te mea ua riro ei peu—ua itehia te hape o te reira mahana, tera ra, ua haamatahia ê na te haamana'ora i te 25. E 532 matahiti i muri iho i te fanauraa o Iesu i tamauhia'i te reira faaturaturaraa, e na te hoê noa iho taata (o Dionisiusa Esigusa) i feruri i te reira. I teie nei ra ua papu i te mau taata *Imi Parau* e, ua hape taua mahana ra, tera ra ua riro ei peu matarohia e aita â i tauihia. Te vai ra paha te mahana!

PARAU TAUTURU.

Mika 5:2. Luka 2:1-7. Buka Fafau 22:1

Tuatapaparaa Mo'a i pupaihia e Robeta.

I nauanei hoi i fanau ai te Ora no outou i te oire o Davida, oia hoi, te Mesia ra o te Fatu.

A maiti i te e'a tei hau i te maitai i te hi'oraa, noa'tu i to'na fifi, ia matau ra oe i te reira, e riro ia ei mea ohie e te oaoa.

PYTHAGORAS.

TE PARAIMERE

ROBETA M. Johnson.

HENERE C. Teeples.

RAREFA R. Taylor.

NILE B. Chug.

HAAPIIRAA NO TE AVA'E TENUARE.

Ua au hoi te parau i maitihia no te Feia Apî ei haapiiraa no te Paraimere.

A haamata i te tanu i te tahi faaapu tiare iti e a faaitoito i te haapao i te reira i te mau ava'e atoa. A ani i te mau feia Mo'a ia horoa i te tahi mau rê no te faaapu tiare e te faaapu maa tei hau i te nehenehe, i te mau mataeinaa, ia tae i te ava'e Eperera 1938.

A faariro te reira ohipa ei mea anaanatae, a imi i te tiare nehenehe e a faaunauna i te mau oire tei reira te muu pûpû Paraimere e ta ratou mau faaapu tiare. A nenei atoa i te tahi hohoa no te aua nehenehe a'e e a haponu mai i te reira i Papeete nei ia tuuhia na roto i te ve'a. A haapii i te tamarii e mea nahea i te tanu i te haari, te tiare e te maa atoa.

TE MAU PARAU API

Ua riro te oire ra Shanghai i te Tapone i teie nei e te ani nei te Tinito, i te mau hau Papaa ia imi i te ravea no te faahauraa i to ratou peapea e te Tapone,

I teie mau mahana i mairi a'enei, ua rahi te taata tei pohe i te ma'i, i Tubuai, e ua pohe roa o Ramaheiarî â MAHAA, te Peretiteni no te Sotaie-te Vahine Tauturu, e te taata ra o Iosepha SPETH, e te oto nei matou no to raua mo'e roa raa.

Te faaitoito noa nei â te mau feia faaterê Hau, i Europa, i te faatupuraa i te hau, e i teie mau mahana ua itoito roa te Hau Farani e te Hau Baratane i roto i taua ohipa ra, no te mea te manuia ra.

Marcel Bonnet Gérant

Thomas L. Woodbury Imprimeur.

Rue Dumont d'Urville, Orovini, Papeete, Tahiti.